

*Sar o Devel kergyas e romen*⁴⁰

Gelo o Devel te phirel, te dikhel so isi, so nanay. Phirela, phirela, dikhela samo luluzha ko dunya. I vakerela:

– Sa luluzha dikhava, aver nanay. Ka kerav manucha da. E parne luluzhandar – parne manucha. E zhelta luluzhandar – zhelta manucha. E lole luluzhandar – lole manucha.

Ya, ama dikhela-dikhela, na bendinela le chhipota. Astarzhas pe parne chhora. Lachhes, ama isine ekh kali bal late i oy perela ko vasta, ko parmatsya. I ov kerela e romen katar leskiri kali bal. Akana o Dev-leskoro surati loshanilo – e romentsa leskiri sasti buti ali pe thanes.

Ake soske akana o roma si kale, a o Devel prostinela lenge, soske si lengoro manush. O Devel but dehala len, loshanela e romenge sar pe chhvenge – nali kerdyas len pestar, katar piri kali bal.

⁴⁰ Desislava Rangelova (Teshika)